

Jahresrückblick des Präsidenten zum Vereinsjahr 2024

anlässlich der Generalversammlung vom 06. März 2025

Ja liebi Küsnachter Vereinsmitglieder und *innen, dä **Jahresbricht** vom Presidänt wird Eu nöd erspart bliibe. Eigentlich müesst mer dä für s'Protokoll in Hochdeutscher Sprache verfasse...? Aber in Mundart gaht's au. Damit ich nüt chan vergässe, wird ich de Bricht aber abe läse. Än Momänt lang han ich die Ziile welle in Mundart verfasse.. han's aber dänn lasse. Ich hetti z'vill müesse umme fiile a dene ville Ziele!!

Wo'n'ich vor'eme Jahr da inne g'wählt worde bin, han ich eigentlich gar nöd g'wusst, was uff mich zue chunt... Mer isch ja nöd allzuoft Presidänt. Aber de Vorstand, wo da näbed mir sitzt oder irgendwo im Saal höcklet, hät mir das Amt sehr erliechtered. Damit das au in Zuekunft so chan bliibe, schriited mir ja spöter no zu de Wahle vom sälbige.

Mir händ letscht Jahr tolli Unterhaltig g'ha mit mim Country Fründ Marco Gottardi, zämme mit sim Guitarre Buddy Gianpiero Colombo. Mir werded spöter g'seh, was öis disbezüglich das Jahr erwartet?

Ich han dänn mini Amzsantrittsred ja grad sälber g'halte und mich "in Prosa" vorg'stellt. Und han damals die Vorstellig g'ha, vo 200 Mitglieder. Wie's um de Verein staht, hä'mir ja scho vorgängig g'hört, und äs g'seht guet uus.

s'Finanzielli ebenso und das wird Eu im Anschluss no präsentiert. Immer äs guet's Zeiche für de Presidänt, wänn nöd ä z'grossi Zahl vo Mitglieder de Uustritt gänd?!

Drum dank ich scho mal für's Vertraue.

Dä schöni Anlass isch au mit Foto und Bricht i öisne Lokalblätter erschine. Äs hät derzue än Hinwiis gäh, vomene geneigte Läser, mer söll doch grad en Link zu öisere Web Site inne schriibe, wo mer sich als Neumitglied chan aamälde. Das wird dämm Herr verdankt und isch i de zuekünftige Bricht au passiert. Mini Vorstellig als Presidänt a de Mitgliederversammlig vo de *Senioren für Senioren*, hät dänn im Ziihtigsbricht zun'ere Verwächslig g'füert und de Ruedi Enzler isch als neue Presidänt uufglistet worde. Du g'sehsch Ruedi, obwohl Du gar nöd am Aalass g'sii bisch, häsch en bliibende ldruck hinterlah au bi SfS !!

FRÜHLINGSAUSFLUG (DO, 16.05.2024)

Mir sind, im Gägesatz zu de erwähnte *Senioren für Senioren*, eher die wo chli unterwägs sind mit Eu. Und die ersti Reis im 2024 isch ganz ä tolli, für einigi sogar chli aasträngendi, g'sii.. Sie isch under em Name **Schoggi und Chäs** i d'Anale vom KSV iigange. Churz zämmeg'fasst sind mit 54 Mitreisende doch fast ein Drittel vom Verein derbii g'sii. Heicho sind mir mit eim weniger, dä hät wohl frühzeitig scho gnueg g'ha, vo was ? weiss mer nöd genau. Villicht doch wäg'em rächt frühne Uufstah und scho vor de 7ni parat si a de Bus Pick-up Stelle ?? En guete Uusflug bruuch ebr au en bezytige Start...

Nach em obligate Gipfeli- / Kafihalt sind mir z'erst go Schoggi verköstige im Chocolarium um aaschlüssend en Chäs-Chueche z'verzehre i'de Schaukäserei in Geis. Grad 2 interessante Führige sind einige dänn doch ächli z'vill worde... Und mer isch froh g'sii, zum Stopp bim Toni Brunner im *Haus der Freiheit*, nur no chöne d'Füess under'em Tisch uus z'strecke! g'seicht hät's erst bim Heifahre

Tagesausflug HURDEN (Mi, 12.06.2024)

scho traditionell zum vermehrte Mal durreg'fühert, wird dä Alass au das Jahr wieder im Programm si. s'isch eifach en g'müetliche Tag und bi schönem Wätter no g'nüsslicher. Chli zugfahre, g'müetlich über de Holz-Stäg tschumple, Vegetarische Salat, Fisch oder Vogel g'nüsse und mit'em Raddampfer hei dampfe. Wer am Morge uff'em Perron scho weiss, uff was er Zmittag g'luscht hät, git das am Ruedi bekannt... z'hoffe isch, dass mer's dänn, am wiiss deckte Mittagstisch, au no weiss, wänn's serviered. Mir mached's namal!

Wanderung KITTENMÜHLE (Mi, 10.07.2024)

Bim Besammle uff de Allmend bim Bushüüsli, han ich scho Angst g'ha, ich heigi d'liladig nöd richtig g'läse.. aber na-dis-na isch de Gsamtvorstand (mit einere Absänz) iitrudlet und losmarschiert. Alli andere, am Uusflug Interessierte, händ derzue s'Fahre vorzoge und öis im chüehle Schatte i de Kittemühli Wilkomme g'heisse.

Ich han bi dere Glägeheit uff'em Tablet, die nöi uufg'schalteti **Vereins Home Page** chöne vorstelle. Erstellt hät sie de Nik Grimm, seines Zeichens IT/Website Betreuer bim Verein *Senioren für Senioren* und natürlich au bim KSV derbi!

www.kuesnacterseniorenverein alles chlii und annenand **.ch** muesch iitippe...

d'Siite isch so konzipiert, dass sie uff em PC, Tablet und em Handy guet darg'stellt wird! Ihr findet det druff alles Wüssenswerth und chönd Eu digital aamälde und natürlich informiere über s'Geschehen!

A dere Stell en Dank und Applaus für die tolli Arbeit, dä gaht an Nik Grimm!! Im Nachhinein werded jewils au Fotos und en kurze Bricht druff veröffentlicht.

Ich bemüeh mich, dass jewils öppis i eusere *Dorfpost* und em *Küsnachter* publiziert wird. Leider hät letzterer sini Redaktorin, in Anführigszeiche:

"verlohre", und ich somit mini guete Beziehige. Mal luege.. au wie's mit de DORFPOST wiiter gaht. A de GV vom Gewerbeverein Küsnacht isch a de GV zu'n'ere nöd schlüssige Abstimmig cho. Äs wird drum no brieflich abgstumme: ob s'Blatt no bis a die nächst GV 2026 usse chunt,

ob's ab Summer 2025 sistiert wird

ob's trotz grossem Verlust in irgen einer andere Form wiiter g'führt wird?

De Martin Schneiter hät für letschteres äs Plädoier g'halte, liit Ihm doch das KGV Sprachrohr sehr am Herze.

BOCCIA-GRILL-PARTY (DI, 20.08.2024)

s'isch schön, dass mir so'ne tolli Aalag händ in Itschnach. Stolz betreut und gwartet wird sie vom Albert Sturzenegger und sine Angels, und das schon ganz vill Jahr. Albi mir chömed wieder!! Die wo'sich nümme chönt nach'em Pallino bücke, hocked zämme bim Jasse oder g'nüssed ganz eifach die leckere Grillade. Vo wämm, vom beschte Grillör nördlich vom Üetliberg, unterstützt vom fliissige Fritz Blaser und wiitere Vorständler. In Globo en APPLAUS!!

HERBSTREISE STANSERHORN (DO, 05.09.2024)

Mängisch isch mer froh, wänn in letzter Minute no 2/3 Lüüt absäged und somit keis Extrabusli muess hinenah fahre. Nach'em Gipfelhalt im Tell, hät de Presi no as paar interessante Zahlen, Facts and Figures über die Stanser Drahtseilbahn, Eröffnet: 1893, chönne verzelle. Wältwiit die ersti Seilbahn mit CABRIO, d.h. mer hät chöne uff's "Sunnedach" uff stige zum de Näbel gnüsse. I dämm Näbel händ sich einige chli verlohre g'fühlt und nüd genau g'wusst, wie's wiiter gaht? Überraschend vill fitti Senioren*innen sind drum uff de Gipfel g'chratzlet. s'Drehrestaurant hät d'Orientierig nöd eifacher g'macht... nach'em Händwäsche häsch müesse sueche, wo dini Äpler-Maccarone hie g'fahre sind.

Für äs nächst's Mal wird en Tourplan usg'arbeitet, damit jedermann/frau au no weiss, wänn's Bähnli durab gaht. Das hilft, d'Berg-Suchaktione uff äs Minimum z'beschränke.

Uff de Zürisee-Fähre hät sich, de vorab rächt schlächti Wätterbricht, dänn doch no bewahrheitet und s'hät agfange ragne.

Öppis wo nöd uff de Homepage stah und kei liladig gäh hät, isch aber trotzdem erwähnenswert: ä Schnapszahl hät de **Ruedi Enzler 77** (am 25.09.2024) g'fired und im Nachhinein werded Ihm sicher alli mit'eme Applaus gratuliere.... APPLAUS!!

De Vorstand hät sich grad sälber applaudiert und äs Uusflügli g'macht:

WOW, VORSTANDSAUSFLUG (MO, 18.11.2024)

Vorbildlich ööfig isch mer uff Züri is WOW Museum züüglet. Wer "Room for Illusions" nöd kännt, sött sälber vorbii gah. Öis isch'äs mehrheitlich rächt trümmelig worde... nöd nur, will mer villes über s'Händy App muess löse und erfahre, nei, au will mer öppe in Schräglag cho isch. Bodeständig isch mer go Zmittag ässe im Restaurant Rheinfelder Bierhaus.

Im Volksmund au bekannt als "Bluetige Tume". De Name stah au symbolisch für am Vorstand sini Vereinsarbeit, wo sich mit dämm Usflug für sini "Bluetige Tume" belohnt hät. Mir schaffed alli unentgältlich ! Ich han sogar sälber mit em Einzahlungsschein (und em gälbe Büechli) mini 40.- Franke überwiise!

Äs git no de **JASSPLAUSCH** in katholische Pfarreizentrum. Dä Alass wird aber über d'Gemeinde organisiert und äs Datum isch mir na keis bekannt?

JAHRESSCHLUSSFEIER (SA, 30.11.2024)

Nöd nur s'Jahr, au ich chum zum Änd! Über en Alass z'brichte, wo'n'ich gar nöd mitg'macht han, wäge Ferienufenthalt in Süd Afrika, isch schwierig.

Min chline Bitrag g'sii, isch nöd ä Wiehnachtsgschicht,
sondern nur äs chliises Gedicht,
wo'n'ich i unter de warme Sunne,
dichtet han im südliche Afrika unne.

Ich danke am Referänt Andy Tanner für's vorträge.

Ich hoff aber, die Schlussfiir heig allne g'falle und au g'mundet, ich han nur guet's vernoh.

Mir bliibed derbii, bi dämm vorwiehnächtliche Zämmesii im HesliHalle Foyer. Mit musikalischer Unterhaltig, aber ohni Wiehnachtsgschicht, ohni Vorträg, ohni Cherzli i de Mandarinli und ohni Tannechriis. De Spieltrieb zum zeusle, isch bi ältere Lüüt mängisch eh grösser als d'Ufmerksamkeit.

Jetzt dank ich aber **Eu allne** für d'Ufmerksamkeit zu dämm Jahresrückblick und hoffe, Ihr chönd dem Bericht zuestimme??

Eure Presi: Peps Dändliker